



Kamis, 18 Januari 2024
Ogen : 2 Raja-raja 4:18-20



Mate Anakna



Sangap kal niakap i bas ngaloken ulih pertoton (pengarapen) sedekah enda. Malem ate, nggeluh dem i bas keriahen. Bage me diberu Sunem, ibereken Dibata pertoton Elisa ipupusna anak Dilaki. Piga-piga tahun kenca si e, anak e reh belinna. Paksa peranin, i bas erpagi-pagi lawes anak e ndahi bapana ku juma. Rempet nderkuh ia dinging nina "mesui takalku." Megi sora nderkuh e minter isuruh bapana suruh-suruhenna ngangkip anak e dinging mabasa ku nandena. Kenca si e iangkip nandena me anak e, mulai erpagi-pagi nari seh ciger. Bage me perjuangan nande, la igejapna latih ngampu anakna erpagi-pagi nari seh ciger, alu tujun segelah anak e madan. Tapi kai si jadi, i bas ciger wari mate me anak e. Mate i bas ampun nandena. Pusuh nande seh getemna, sedak dinging seh beratna. Adi sungkun ku bas pusuh, situhuna labo kita ngasup ngaloken situasi si bage rupana. Anak si ndube enggo ndekah itimai, ibereken Tuhan, genduari i bas ampun nande e ka ia lawes ngadap ku Dibata. Seh cedana ate, dinging la teraloken, sabap sakit kenca pe anak e, enggo menam si akap setengah geluhta e bene enda mate ningen ka. Lanai erturiturin, dinging maun lanai terturiken pe.

Kebenen kalak si ikelengi kita, mereken ngaruh si cukup mbelin ku bas kegeluhen, subuk emosi, semangat ngeluh bage pe man kinitekenta. Maun turah nge i bas pusuh, 'i ja kam Tuhan, engkai maka bagenda kal beratna si man alanken, madin kal kuakap leben aku ngadap man baNdu asangken anakku e." Adi diberu Sunem, nina "me labo mbarenda ku pindo anak e man bandu? Ma kukataken pe ola bereken arapen man bangku?" ranan enda ncidahken sedak pusuh, rikut ras rawa. Kune lit pengalam si bage, ampekenlah e man Dibata. Janah kune lit si idah temanta ngalaken perbeben si bagenda, jadilah pendoa syafaat man bana, jadi teman situhu-tuhu arah mereken pergegeh ras perhatiannya.

☞ *"Tungtungkenlah beratna perbeben e man Dibata"*



